

Kempen HIRUK Rafizi boleh jejas imej PKR, cetus kekeliruan akar umbi

- Nurul Izzah membawa pendekatan lebih bersederhana dan matang - selari dengan prinsip PKR sebagai parti progresif menjunjung demokrasi dalaman

- Jelajah HIRUK mungkin membawa slogan idealisme, tetapi jika caranya melanggar etika, maka idealisme itu menjadi retorik kosong yang menghancurkan parti dari dalam



Oleh Prof Dr Rusdi Omar
bhrencana@bh.com.my

Dekan
di Ghazali Shafie
Graduate School of
Government
(GSGSG,
Universiti Utara
Malaysia (UUM))

Pemilihan PKR bagi penggal 2025-2028 esok bakal menjadi antara paling mencahar dalam sejarah parti reformasi ini.

Tatkala idealisme dan perpaduan parti sepatutnya menjadi teras kempen, apa yang berlaku sebaliknya - perebutan jawatan Timbalan Presiden antara Datuk Seri Rafizi Ramli dengan Nurul Izzah Anwar membuka ruang kepada politik personaliti, serangan dalaman dan pelanggaran jelas terhadap tata etika parti.

Paling menonjol ialah tindakan Rafizi menggerakkan kempen Jelajah Hidupkan Idealisme Reformasi Dalam

Ujian Kuasa (HIRUK) yang bukan sahaja meminggirkan tanggungjawabnya sebagai Menteri Ekonomi, bahkan mencetuskan kekeliruan, ketegangan dan kritikan dalam kalangan akar umbi dan kepimpinan parti.

Ketika negara bergelut dengan kos sara hidup, ketidaktentuan ringgit dan pelaburan asing yang perlu dipertingkatkan, tindakan Rafizi menjelajah ke seluruh negara dengan membawa agenda politik peribadi menimbulkan persoalan besar: Di manakah keutamaan beliau sebagai anggota Jemaah Menteri?

Tindakan ini membuka ruang kritikan bahawa beliau seolah-olah meletakkan kepentingan dalaman parti mengatasi mandat rakyat.

Lebih malang apabila beliau dilaporkan memberi isyarat untuk meletakkan jawatan Menteri Ekonomi jika tidak menang pada pemilihan, satu tindakan yang dilihat sebagai bentuk ugutan politik tidak wajar dan tidak profesional.

Politik matang tidak mengizinkan sebarang bentuk ugutan emosi yang boleh menjejaskan kestabilan kerajaan dan ekonomi negara.

Kemuncak kontroversi adalah apabila Rafizi mengumumkan senarai penuh 'cai' pilihannya

satu langkah yang bercanggah secara langsung dengan Garis Panduan Pemilihan 2025 ditetapkan Jawatankuasa Pemilihan Parti (JPP).

Walaupun penggunaan cai dalam bentuk digital dibenarkan secara terhad, pengumuman terbuka dan agresif Rafizi melalui Facebook memperlihatkan unsur kempen berkumpulan dilarang keras.

Perkara ini ditegur secara langsung oleh Pengerusi JPP, Datuk Seri Dr Zaliha Mustafa, yang mengingatkan calon tidak boleh memaparkan bahan kempen dalam bentuk berkumpulan, sama ada fizikal mahupun dalam talian.

Tambahan pula, dalam kenyataan rasmi Lembaga Disiplin Parti bertarikh 14 Mei 2025, teguran mengenai keperluan menjaga peruntukan Perlembagaan PKR berikut sudah dikeluarkan:

Perkara 10.1.6 - "Melindungi dan menjaga nama baik parti."

Tindakan menyerang pemimpin dalaman parti dan mendedahkan percaturan dalaman parti mencemarkan reputasi PKR sebagai parti bersatu padu.

Perkara 10.2.2 - "Membuat kenyataan umum yang tidak benar berbentuk fitnah terhadap mana-mana anggota parti."

Beberapa ucapan dalam siri jelajah HIRUK memperlihatkan kecenderungan menyerang peribadi dan kredibiliti pemimpin lain yang bertanding secara terbuka.

Mengikut kenyataan JPP pula, sebarang bentuk kempen berkumpulan mempamerkan elemen pasukan, senarai atau regu secara fizikal atau digital tidak dibenarkan sepanjang tempoh rasmi kempen.

Larangan ini bertujuan mengelakkan pengaruh politik wang atau penyusunan kuasa secara tidak sah; perpecahan dalaman melalui pembentukan fraksi saling bertentangan serta kekeliruan dalam kalangan pengundi akar umbi yang sepatutnya menilai calon secara individu.

Namun, pengumuman cai Rafizi 48 jam sebelum hari pengundian nyata bercanggah dengan

semangat garis panduan ini. Dalam konteks ini, tindakan Rafizi boleh membuka ruang kepada siasatan dan tindakan disiplin, termasuk amaran rasmi, penggantungan atau bahkan pemecatan jika didapati bersalah.

Kempen dilihat sebagai agenda kelompok

Kempen agresif Rafizi di bawah naratif HIRUK tidak lagi menggambarkan perjuangan kolektif reformasi, sebaliknya dilihat sebagai agenda kelompok.

Ketika parti menyeru agar semua calon menjauhi politik peribadi dan mendahulukan perpaduan, tindakan Rafizi bertentangan secara terang-terangan dengan seruan berkenaan.

Apatah lagi apabila Lembaga Disiplin juga mengingatkan kekuatan parti bergantung kepada solidariti sesama anggota dan perbezaan pendapat sepatutnya disalurkan melalui wacana dasar, bukan serangan terbuka.

Di sebalik hiruk-pikuk politik Rafizi, pencalonan semula Nurul Izzah, yang sekian lama dianggap ikon reformasi dan integriti dalam PKR, memberi harapan baharu.

Tanpa retorik berlebihan, beliau menawarkan kepimpinan lebih inklusif dan berpaksikan agenda dasar parti, bukan personaliti. Beliau juga dilihat tidak menggunakan taktik serangan terhadap rakan seperjuangan atau menjanjikan habuan politik untuk meraih sokongan.

Nurul Izzah membawa pendekatan lebih bersederhana dan matang - selari dengan prinsip PKR sebagai parti progresif menjunjung demokrasi dalaman. Tidak ada cai, tidak ada ugutan, tidak ada serangan peribadi.

Pendekatan beliau lebih konsisten dengan garis panduan pemilihan, sekali gus mencerminkan seorang pemimpin reformasi tulen.

Rafizi sepatutnya menghentikan politik pecah belah dan kembali kepada semangat idealisme yang jujur. Beliau dan kemnya juga harus berlapang dada sekiranya kalah dalam pertandingan ini dan tidak mengambil langkah merosakkan parti dari dalam.

PKR tidak mampu berdepan satu lagi episod perpecahan seperti pada tahun sebelumnya.

Pemilihan PKR bukan sekadar soal menang kalah individu. Ia ujian terhadap kedewasaan politik dalam parti yang mengangkat prinsip reformasi sebagai tonggak perjuangan.

Dalam ujian ini, semua calon - terutama berjawatan dalam kerajaan - mesti sedar tingkah laku mereka mencerminkan integriti parti keseluruhan.

Jelajah HIRUK mungkin membawa slogan idealisme, tetapi jika caranya melanggar etika dan prinsip, maka idealisme itu menjadi retorik kosong yang menghancurkan parti dari dalam.

PKR tidak perlukan suara paling lantang, tetapi ia perlukan jiwa paling tenang dan bijaksana untuk memimpin.

Kempen HIRUK dilancarkan Rafizi yang pada mulanya dilihat bertujuan menghidupkan idealisme akhirnya membuka jalan kepada pencabulan etika dan pelanggaran garis panduan.

Jika PKR ingin kekal sebagai parti mendukung reformasi dan demokrasi, ia harus tegas dalam mempertahankan peraturan dan etika dalaman.

